

Entrevista exclusivo cu BUBU "EL GENERAL" BISLICK..

"40 AÑA DEN MARIACHI TABATA DUSHI...PERO TAMBE A TRESE HOPI PROBLEMANAN AMOROSO"..

Texto : Poets.

DEN AMBIENTE



** Dia 28 di november proximo den City One, lo bay rindi un merecido homenahe na e gran cantante di mariachi BUBU "El General" BISLICK, kende ta ser considera como e cantante di mariachi di mas grandi cu Aruba y Antillas a yega di conoce. Bubu Bislick ta e unico cantante di mariachi cu a retira invicto como maximo ganador di tur e festivalnan cu el a yega di participa, tanto localmente como esun di Antillas.

DEN AMBIENTE a realiza un entrevista exclusivo cu Bubu Bislick, kende for di basta dia caba ta sufriendo di un quibrante di salud, pero toch a garantiza DEN AMBIENTE cu e lo ta presente den City One pa e gran anochi dedica na su persona, ya

cu e ta aprecia e gesto bunita aki masha hopi mes y ademas ta sumamente contento cu a corda riba dje.

Bubu a cuminsa declara na DEN AMBIENTE cu e 40 aña den e mundo di mariachi tabata un bunita experiencia, pero toch di otro banda a trese hopi problemaman amoroso. Esaki ta debi na e gran popularidad cu e tabata goza entre su admiradornan, mihor bisa den boca di pueblo e bida di saya. Tabata realmente momentonan inolvidable, pero tambe momentonan amargo, debi na e cultura di redashi cu a trese hopi problema pa su persona. Pero pa un banda aworaki den forma cu e ta mira bida, e ta haya cu esaki tabata un bon les pa su persona, pasobra for di e expererencianan ey el a

haya e sentimiento di temor cu ta pone cana e caminda corecto, aunke ta solamente Jesus so por pone hende cana e caminda corecto y ningun hende mas, un Bubu cu hopi sentimiento a expresa na DEN AMBIENTE.

Na edad relativamente joven di apenas 12 aña, Bubu a inicia ta canta den gruponan di Koor y despues pa diferente bandanan musical, pero mas bien den bandanan cu tabata forma e ambiente pa fiestanan familiar.

Bubu ta conta con el a drenta den e mundo di mariachi. Semper el a gusta e musica di mariachi y tabata su amigo Roque Solognier cu a consehe pa e cuminsa canta mariachi, despues cu el a pasa den caya y el a tende Bubu ta canta mariachi y el a aserca Bubu y a puntre si e kier canta den grupo di mariachi y Bubu a conteste "pakico no"?

Mesora Roque Solognier a hasi tur e tramitenan pa Bubu por a drenta den e grupo di mariachi "Mil Amores". Pero e mester a pasa un prueba di ensayo, den cual el a impresionar e grupo aki y asina pues el a bin forma parti di su prome grupo "Mil Amores".

Despues di a cosecha hopi exito cu Mariachi "Mil Amores", nan a forma Mariachi Aruba pa acompaña e gran cantante mexicano Chelo Rivera cu e tempo ey a bin duna un presentacion na Aruba. Hunto cu Mariachi Aruba, Bubu tabatin e honor di por a canta hunto cu varios cantantenan di renombre di Mexico cu a yega di bishita Aruba, manera e.o: Tito Guizar, su yiu muher Lila Guizar, Eva Garza (q.e.p.d) y "last but not least" Minguel Aceves Mejia.

Porcierto su prome trahe di Charo el a cumple for di e gran cantante mexicano Minguel Aceves

Mejia, kende a reconoce Bubu como un gran cantante di mariachi, y como un gran cantante di mariachi segun Minguel, Bubu tabata hasi falta di un trahe di charo y pa no a duna Bubu e trahe di charo pornada, el a ofrece na un prijs di amigo cual tabata solamente pa 100 dolar. Segun Bubu cu e trahe aki tabata uno super luhoso y tabata bal hopi mas cu 100 dolar.

Na aña 1968 Bubu a bay purba su suerte como cantante profesional na Bogota, Colombia, na unda el ser contrata pa e grupo di mariachi Guadalajara. Na Bogota e trabao tabata hopi duro y e sueldo no tabata recompensa esaki. Bubu ta splica cu for di 7'or di anochi te cu ora solo sali nan tabata toca y na dado momento esaki a bira un paranda fuera di bida normal cu el a dicidi pa no sigui mas cu e bida abnormal aki. Pero toch Bubu a keda permanece pa basta aña na Bogota na unda el a forma su hogar cu su segundo esposa.

Na aña 1974, e malesa di heimwee a cuminsa ataca Bubu, debi na pre-ocupacion di salud di su querido Tata, pa cual el a dicidi pa bolbe Aruba. Na su regreso aki na Aruba, el hasi su come back hunto cu mariachi Aruba. Na aña 1979 el a participa den e prome festival di Mariachi Antillas hunto cu mariachi Perla di Aruba y a sa di conquista e prome titulo pa Aruba cu e cancion "EL General", pa cual cancion el a sa di conquista un profundo simpatia y cariño for di su gran fanaticada.

Bubu ta remarca cu hopi hende ta kere cu ta solamente e cancion aki so e por interpreta, pero esaki absolutamente no ta berdad. Bubu ta sigui splica cu cada biaha cu e ta riba escenario, e tabata haye confronta cu un publico brabo cu tabata oblige pa interpreta y par-

ticipa cu e cancion "El General" y e demanda aki tabata uno asina exigente cu practicamente tabata imposibel pa defrauda su publico y aunke e mes no tabatin e gusto, no tabatin otro alternativa di mester complace cu e publico.

Na aña 1983 Bubu a retira for di e mundo di mariachi den un forma invicto despues di a conquista un otro titulo pa Aruba durante e festival di mariachi Antillas cu e cancion "Cuando Vivas Conmigo" di Jose Alfredo Jimenez. Bubu ta conta e motibonan cu a pone retira, esaki ta debi cu e festivalnan pa su persona a cuminsa bira monotono, ya cu cada biaha e participa, e otro participantenan ta laga sa cu si Bubu ta den, anto ya caba nan ta perdi. Pa e motibo aki tambe Bubu a dicidi di hala un banda pa asina duna oportunidad na e jovennan.

Riba e pregunta cu hopi biaha e musica di mariachi ta ser critica cu e no ta e folklor autentico di Aruba, Bubu a contesta cu si nos mester bay riba folklor di Aruba solamente, anto nos tin cu bay cu dande, waltz, tumba y tambu cu ta e uniconan autoctono di Aruba. Awor Bubu ta hasi e pregunta...regae, cadans, rock & roll, salsa, merengue, bolero y tur otro ritmonan cu ta ser interpreta pa tur nos bandanan, cualnan ningun ta folklor di Aruba, pero toch nan ta hopi gusta den pueblo. Anto awor pakico ta punta dede solamente riba e musica di mariachi, un Bubu defensor na su musica tan stima di mariachi ta expresa su opinion.

Na final Bubu "El General" Bislick ta hasi un cordial invitacion na tur su gran fanaticonan pa bin presencia e gran anochi di mariachi dedica na su persona, cual lo ta diasabra otro siman den City One..

Tur cos ta confirma pa dia 19 di december proximo...

CHICHI PERALTA Y SON FAMILIA LO TA NA ARUBA PA UN SOLO PRESENTACION..

Fotos/texto:Poets

DEN AMBIENTE

** Porfin tur cos ta riba pretu y blanco, pues e contrato ya ta firma, cu ta duna DEN AMBIENTE e luho di PRIMICIA y caracter di EXCLUSIVIDAD pa anuncia den tur tranquilidad, cu e tremendo orquesta CHICHI PERALTA Y SON FAMILIA lo ta na Aruba diasabra dia 19 di december proximo pa un solo presentacion.

E tremendo orquesta aki cu apenas tin un aña di existencia, a sa di cosecha hopi exito cu su prome CD "Pa' Otro La'o, for di cual hitnan manera "La Ciguapa", "Amor Narcotico", "Sol de Verano", "Me Enamore" y esun actualmente "Procura", ta hitnan cu a logra varios disconan di oro y doble

platino y tambe diferente premio nan prestigioso manera e.o.: Premio Aplauso di e multi poderoso canal di television Univision na Miami.

Recientemente DEN AMBIENTE tabata testigo di nan acohida grandi durante nan gira na Colombia, na unda DEN AMBIENTE a cubri esnan na Baranquilla, Cartagena y Sta. Martha. Practicamente na Colombia, Chichi Peralta ta e orquesta mas popular y solicitada.

Actualmente e produccion aki a cuminsa haya su acohida grandi na Chile y Spanja, na unda otro aña nan tin un gira basta extenso pendiente.



Pa Aruba sigur ta un honor grandi pa ricibi e tremendo orquesta aki, ya cu nos orgullo musico internacional Hildward Croes ta

formando parti di Chichi Peralta. Pa otro siman DEN AMBIENTE lo tin mas informacion y sigur tur hende kier sa ta na unda e solo

presentacion aki lo ta ????. Pues keda pendiente y sigui lesa bo DEN AMBIENTE..

Durante e anochi grandi di mariachi dedica na Bubu Bislick den City One...

"MAMITA Y CALIXTO" LO INTRODUCI NAN TREMENDO CD "AMOR ES AMAR"..



** Porfin diasabra otro siman dia 28 di november, e fantastico duo Bonereano, "MAMITA Y CALIXTO" lo ta na Aruba, pa introduci nan tremendo CD "Amor es Amar", cual lo tuma lugar den City One durante e gran anochi di mariachi dedica na "Bubu 'El General' Bislick.

Mamita y Calixto ta dos excelente cantante hopi popular na Bonaire, kendenan riba recomendacion di e empresario hulandes Nico de Haan, a uni nan tremendo voz hunto riba e CD "Amor es Amar", cual a resulta den un joya di produccion.

DEN AMBIENTE por a compronde for di Nico de Haan, cu e CD aki su grabacion a ser realiza den e studionan mas renombrada na Caracas, Venezuela, na unda nan a ser respalda musicalmente pa e famoso Mariachi "Perla de Mexico".

E CD aki a resulta den e "Best Seller" hamas visto na Boneiro y tambe na Curacao el a cosecha un exito grandi. Aki na Aruba tambe por a compronde for di Vale Croes di Galeria Moderna cu e interes pa e CD aki tabata hopi grandi, mientras for di Chaparita cu ta produci e tremendo programa di mariachi na Top 95 tur dia for di 5'or di marduga, a duna di conoce cu tur dia e ta ricibi masha hopi yamada pa varios di e cancionnan cu ta aparece riba e CD aki.

Nico de Haan a duna DEN AMBIENTE di conoce cu dia cu nan a realiza e bautismo di e CD aki, nan a kibra record cu un asistencia di mas cu 2 mil persona. Tabata algo increibel segun Nico de Haan, kende a declara cu riba e dia ey mes, nan a vende mas cu mil ehemplar.

E exito tabata asina grandi, cu recientemente Mamita a viaha pa Caracas, Venezuela, na unda el a realiza su grabacion pa su siguiente produccion como solista.

DEN AMBIENTE ta spera cu e duo Bonereano aki lo sa di haya nan merecido apoyo serca nos dushi hendenan di Aruba y naturalmente e dushi hendenan di Boneiro residencia aki na Aruba indudablemente lo ta na boshi den City One...

Awenochi den Hit & Run...

GRAN BAUTISIO C.D. "ATE, ATA..QUA-SI"...

** Awenochi den Hit & Run, lo bay tuma lugar e gran bautismo di e tremendo CD "Ate, Ata..Qua-Si". Esaki lo bay combina cu un fiesta bailable ala estilo concierto, na unda Qua-Si cu su estreya cantantenan, C-Zar Olarte, Nando Chirino, Gregory Velasquez y Ricky Marsdin lo bay resona tur e hitnan cu ta aparece riba e CD.

Prome cu e CD mes a subi riba mercado, ya caba e hit promocional "Bow Pali Tamarijn" a hasi su bon trabao y a resulta den un exito rotundo. Actualmente na

Corsow e cancion aki tin un acohida grandi y esaki a ser confirma durante e programa "Show di Poets" na Top Fm pa dj Leonon di

Hit Fm 103, kende porcierto ta e cantante nobo di Rizam.


Ma informacion cu a drenta for di Corsow ta indica cu siman pasa "Bow Pali Tamarijn" a subi Top 40 di Radio Corsow Fm riba e puesto 35. Tame Little di ERA a mustra hopi interes pa nan cuminsa presentacion e cancion di "Hari Numa", cual ta cuadra cu e toke di nan estilo.

For di nos coresponsal na Hulanda, por a compronde cu "Bow Pali Tamarijn" ta causando furor.

Lamentablemente e autor di e cancion aki kende ta e gran cantautor Rudy Plaate, no por ta presente awenochi pa fungi como padrino di e CD, esaki ta debi cu actualmente e ta hospitaliza. Pa e motibo aki,

Meiller Lourens propietario di Qua-Si ta brindando honor na e patronizador PEPSI, kende pa 18 aña consecutivo a brinde tur clase di cooperacion y confianza. PEPSI lo ser representa pa Ricky Slagt kende lo fungi como Padrino y como Madrina, Maria Punsellie ruman muher di e fayecido Pedro Punsellie (q.e.p.d.), kende tabata un gran motor ehemplar technico desde Qua-Si su inicio.

Tambe pa hasi e anochi mas ambientoso, lo tey presente e muchanan Kadushi di DREAM. Pues un anochi puro natural di Kadushi y Tamarijn...pues bin cu bo sucu...



** Aki por aprecia C-Zar Olarte, Nando Chirino y Carmicheal Bikker ta hasi entrega di e CD na Rudy Plaate cu ta e autor di e inolvidable cancion "Bow Pali Tamarijn". Na e mesun momento aki a participa na Rudy Plaate cu ta un honor grandi pa Qua-Si, pa su persona fungi como Padrino di e CD aki, riba cual Rudy Plaate a keda masha contento y a acepta pa ta na Aruba, pero debi na quebrante di salud, esaki no ta posibel. Pe medio di DEN AMBIENTE, Qua-Si ta manda palabranan di pronto recuperacion pa Rudy Plaate...

Ademas di lo bay goza un mundo durante e "Two Man Show" di Vale Croes y Pachi Damon...

TAMBE POR GANA COMO DOORPRIZE UN FELIZ SIMAN DI ESTADIA NA ORLANDO, FLORIDA..

Fotos y Texto: Jan Poets.

DEN AMBIENTE



** Otro siman dialuna dia 30 di november, 1 y 2 december den Cas di Cultura lo bay tuma lugar e tan spera "Two Man Show" di e dos comiconan mas aclama tanto aki na Aruba como Antillas, esta Vale Croes y Pachi Damon.

Interes pa solamente e tres funcionnan di e "Two Man Show" aki ta masha grandi mes y for di dialuna awor e ticketnan lo sali riba mercado y ta obtenible solamente na e establecimentonan di DOWCO, na Cura Cabay, Sta. Cruz y Oranjestad.

Ademas cu no tin duda cu e publico lo bay goza sin fin y hari nan barica yen, pa asina aki tambe los nan ultimo stress di aña '98, tambe nan lo bay tin e tremendo oportunidad pa gana como doorprize un siman feliz di estadia den e luhoso VIS-

TANA RESORT na Orlando, Florida, cual ta inclui pasashi ida y vuelta cu nos prestigioso aerolinea nacional AIR ARUBA.

Tambe durante intermedio e BUNNY ENERGIZER lo hasi un bishita y lo regala su bateria energia campeon mundial na tur esnan cu tin un bateria energizer ya uza.

Mientrastanto cu Pachi Damon a laga sa na Vale Croes cu e mester bin den Cas di Cultura cu "Bullet Proof Vest" y Vale a manda conteste cu Pachi mester cuida su atras, pasobra e e biaha aki e ta den su cas.

Ta recomenda pa sigura bo ticket asina cu e sali riba mercado cu ta for di dialuna awor, pasobra no lo bay tin mas ripiticion y lo ta un duele si otro bin conta con bon nan a pasa..

SHOW DI "WINTER WONDERLAND" LO BAY TA UN EXITO..



** Diahuebs anochi DEN AMBIENTE tabata presente den Cas di Cultura y a presencia e ensayo en general di e show "Winter Wonderland", cual lo ser presenta pa e grupo "Cos di Mucha and Teens". Porcierto ayeranochi tabata e premiere, cual DEN AMBIENTE na ultimo hora por a compronde cu a resulta den un exito sin precedente.

Pa loko DEN AMBIENTE por a mira durante e ensayo, a duna un bunita impresion cu ta vale la pena pa tur e funcionnan cualnan ta solamente durante e fin di siman aki cu ta awenochi y mayan atardi den Cas di Cultura, mester ta un yeno completo. Durante e ensayo aki por a nota un entusiasmo grandi entre e artistanan joven, kendenan pa basta dia caba ta dedicando

tur cu tin pa cu e show navideño aki. E show aki lo ta uno masha bunita, interesante y agradable. Nos muchanan den compania di nan mayornan lo bay disfruta inmensamente di un espectáculo hamas visto.

DEN AMBIENTE ta desea grupo "Cos di Mucha and Teens" hopi exito cu nan show "Winter Wonderland"...

Grupo Polymnia ta lansa un otro tremendo cancion..

..."BAN CELEBRA CU POLYMNIA... FELIZ PASCO PA UN Y TUR"...



** Aki por aprecia e estreynan di POLYMNIA, (d.r.p.) Ruthlin Werleman, Loren Flores, Ivana Werleman y nan futuro star Mayra Werleman..

** E fantastico trio juvenil "Polymnia" forma pa Loren "Peace" Flores, Ruthlin "Angel" Werleman y Ivana "Sport" Werleman, despues di nan exitoso cancion "Un Salsa pa Mamai", ta bolbe lansa un tremendo cancion pa e dushi temporada di navidad titula "Ban, Ban Celebra".

For di diamars caba e integrante nan aki den compania di nan dinamico manager Lorenzo Flores a cuminsa cu nan campaña di promocion bishitando e programan navideño na e diferente radio emisoranan. Tur e radio emisoranan a ricibi un ehemplar di un CD cu ta contene e cancion aki.

DEN AMBIENTE tambe a ricibi un ehemplar y a keda sumamente encanta pa e formidable trabao

realiza pa cu e produccion aki. E cancion aki su ritmo ta un mezcla di waltz cu e sabor di tambora, cual ta hasie uno unico y agradable.

E grabacion a tuma luga na Watapana Recording Studio, na unda Polymnia a conta cu gran apoyo di nos gran musiconan, Robert Jeand'or (bajo/areglista y tecnico di studio), Efi Thiel (sequencer), Doedel Sofia (cuarta/wiri), Orlando Albus (tambora), Wiwi Peña a fungi como director musical y Emile Kelkboom como tecnico di studio.

Riba e caratula di e CD promocional grupo Polymnia a dedica algun bunita palabra cu merece su publicidad. "Temporada di fin di aña ta e temporada unda cada un

di nos mester reflexiona riba e aña cu ta pasando. Un temporada, unda famianan ta bini hunto riba nos dushi isla Aruba pa celebra y egada di Niño Hesus y e cambio di Aña. Polymnia cu e cancion aki "Ban, Ban Celebra" ta invita e pueblo di Aruba pa celebra hunto cu nan e temporada di fin di aña. Cu DIOS drama su bendicion den cada hogar riba nos dushi isla y cu e aña venidero ta uno yen di pas, amor, felicidad y salud pa nos tur".

Pa un presentacion of copia di e tremendo cancion aki, por yama Lorenzo Flores libremente na tel: 833638/8328210 of 936008. Un danki ta bay pa henter pueblo di Aruba pa acepta Polymnia su canto den cada hogar..

Hopi hende ta yama puntra Den Ambiente di con no a bay cubri Miss Mundo.. RECORDANDO E CERTAMEN DI MISS MUNDO MAS TURBOLENTO NA INDIA...

Fotos/texto: Jan Poets.

DEN AMBIENTE



**** Por mira claramente e alegría riba e cara di Mrs. Morley kende ta fundadora di e certamen Miss Mundo, na momento cu DEN AMBIENTE a hasi entrega di e poster na su persona..**


** Diahuebs awor dia 26 di november lo bay tuma lugar final di e certamen di Miss Mundo 1998 na e encanto isla di Seychelles, cual ta un isla masha bunita situa entre India y Oost Africa. Aruba ta ser representa pa Judelca Briceño, kende sin duda ta haciendo su maximo esfuerzo pa trese e prome titulo di Miss Mundo pa Aruba, cual sigur lo ta algo historico y porcierto e promocion di mas grandi cu Aruba por ricibi. Ta pesey mes nos tur como bon Arubiano mester desea tur clase di suerte y exito pa Judelca Briceño.

Durante tur e dianan aki, DEN AMBIENTE ta ricibi yamadanan y tur caminda cu DEN AMBIENTE bay, hendenan ta puntra di con no a bay pa apoya Judelca Briceño.

Pa DEN AMBIENTE mes ta un lastima cu no por a acompaña Judelca Briceño pa Seychelles, pa asina por a brinda tur clase di

apoyo y trata pa hinca den e spotlight mundial mas tanto cu ta posibel, debi cu ta esaki ta conta den un certamen mundial, pa probeca di e oportunidadnan unico aki pa promove bo pais mas tanto cu ta posibel. Aunke e candidata no logra, pero toch bo a sa di probeca di promove bo pais entre tur e periodistanan internacional.

Como experiencia di tur DEN AMBIENTE su presencia den e diferente certamen mundial, e trabao di un periodista por ta mucho mas fructifero cu e propio candidata mes. E por ta zona straño, debi cu semper ta e candidata ta haya tur e merito ora e logra, pero ora e no logra, e periodista si a logra di promove su pais entre su coleganan. Esaki ta debi cu e candidatanan ta asina hopi, cu ta dificil pa e periodistanan focus riba tur, y muy en particular un isla chiquito y hasta desconoci manera Aruba. E periodistanan ta focus solamente riba paisnan di nomber grandi y si no



**** Aki Mr. Morley pionero di e certamen Miss Mundo ta expresa palabranan na e periodistanan, pa nan tuma ehempel na e poster aki cu ta ilustra e positivismo di e certamen, enbez di ta pusha palo bao candela..**



**** Esaki tabata e TAXI priva di DEN AMBIENTE durante e certamen Miss Mundo na Bangalore, India..**

tin un periodista pa pusha Aruba, anto Aruba por wel di lubida pa saca mas probecho di promocion durante e certamen.

Hopi por bisa kico nan kier, pero DEN AMBIENTE sa kico DEN AMBIENTE ta skirbi y e pruebanan tey, na unda cu DEN AMBIENTE a bay apoya nos Missnan, aunke cu nan no a logra nada, toch nan a bolbe Aruba cu hopi satisfaccion, debi cu DEN AMBIENTE a percura pa nan por a haya nan merecido reconocimiento. Un ta berdad Wendy Lacle??

Na aña 1994, DEN AMBIENTE a apoya Dianne Escalona na Mexico y como e unico periodista a pone henter Aruba den gran expectativa y hasta pa prome biaha den historia gran parti di e pueblo a mira e certamen anto den style di barbecue. Na aña 1996 cu e triunfo di Taryn Mansel na Las Vegas na unda DEN AMBIENTE tabata presente, ta fiesta di carnavales tabatin na Aruba, mientras cu den e mesun aña 1996 a viaha pa Bangalore, India, pa apoya Afra Henriquez, na unda Afra a logra di clasifica entre e 10 finalistanan.

Esaki tabata e certamen mas turbulento hamas visto den historia di un certamen, debi cu un grupito cu ta pertenece na un religion di India, tabata contra pa realiza e certamen aki na Bangalore. Tur e periodistanan tabata concentra y dedica mas atencion na e controversia, enbez di duna atencion na e beyezanan.

Tabata aki cu DEN AMBIENTE a score engrande cu e super poster traha di propio iniciativa y creatividad, cual tabata expresa cu "Miss World Aruba Afranina Henriquez Love the children", cual tabata cuadra exactamente cu e filosofia di e certamen. E poster aki a ser altamente aprecia pa e famia Morley, kendenan ta fundador y pionero di e certamen Miss Mundo, debi cu e poster aki tabata e unico cu tabata propaganda e positivismo di e certamen.

DEN AMBIENTE a logra cu hasta e poster aki a ser pasa via e poderoso canalnan di TV, CNN, CBS, ABC y NBC. Tambe a logra di entrega e famia Morley,

kendenan a keda sumamente encanta cu e poster y hasta a expresa na e otro periodistanan cu nan mester tuma ehempel na e poster aki, enbez di ta pusha palo bao di candela.

Cu esaki DEN AMBIENTE kier a demostra cu na unda cu DEN AMBIENTE bay, ta traha cu hopi amor y cariño na bienestar di Aruba na prome lugar. Pero ta lamenta profundamente cu DEN AMBIENTE e aña aki a ser malamente BOYCOTIA pa STAR PROMOTION y a hasi imposibel pa realiza entrevistanan y tuma potretnan di e candidatanan.

Esaki debi cu Star Promotion no por contra criticanan constructivo, pero toch sistematicamente a tuma

nan na cuenta, pero di otro banda a saca venganza riba DEN AMBIENTE, pa asina otronan por goza, sin toch alfinal por a hasi net nada. Di con no a manda un persona pa respalda Judelca Briceño na un isla asina leu for di Aruba, e contesta ta simpel, ta pasobra ningun no tin e curashi.

Djis un ehempel DEN AMBIENTE ta duna, aña pasa cu Michella Lacle a representa Aruba na Seychelles y suerte no a toke, ningun hende no tabata sa mes ki dia el a yega Aruba, corda pa maske ta sikiera dune un poco gradicimento pa tur su sacrificio nan cu el a hasi pa representa Aruba den un certamen mundial..



**** Afra Henriquez ta hasi entrega di e poster na un presentadora di un canal di TV..**